

23 JUN 2001

Umno-Gulung (Naib Presiden)

USAHA TAMBAH KEANGGOTAAN UMNO DIPERGIATKAN

KUALA LUMPUR, 23 Jun (Bernama) -- Usaha menambah keanggotaan Umno akan diteruskan ke setiap pelusuk negara sebagai persediaan segera parti itu menghadapi pilihan raya umum akan datang.

Naib Presiden Umno Datuk Seri Najib Tun Razak berkata kempen penambahan anggota akan dilakukan secara besar-besaran menerusi sasaran kerja setiap bahagian.

Bagi membuktikan kesungguhan usaha ini, Umno bahagian akan dijemput untuk menyerahkan secara simbolik borang anggota baru kepada presiden (Datuk Seri Dr Mahathir Mohamad), katanya ketika menggulung perbincangan pada Perhimpunan Agung Umno Ke-55 di Pusat Dagangan Dunia Putra di sini hari ini.

Najib yang juga Pengerusi Jawatankuasa Keanggotaan dan Pendaftaran Pemilih berkata setiap bahagian akan diminta mendaftarkan anggota parti sebagai pemilih.

Pendaftaran pemilih oleh Suruhanjaya Pilihan Raya (SPR) tahun depan mungkin merupakan gerakan terakhir sebelum pilihan raya umum akan datang dijalankan, katanya.

"Marilah kita menyambut program ini (tambah anggota) dengan penuh semangat dan meletakkannya sebagai asas kemenangan pada pilihan raya akan datang," katanya.

Seorang lagi Naib Presiden Tan Sri Muhammad Muhamad Taib pula berkata Umno akan hancur dan bangsa akan musnah sekiranya parti itu tidak dijaga.

"Dulu Melayu pernah duduk dalam empayar besar Melaka tetapi apabila bangsa sering bersengketa, adu domba dan tenggelam punca, Melayu hilang segalanya," katanya.

-- BERNAMA

RZS AZZ LAT